

DOPO DOI SECU E MIEÇ ROME E RIABILITE AQUILEE

No si pò dineâ il fat che, se la storie e je mestre di sorpresis, la glesie e je mestre tal lei la storie.

Un ch'al cognòs alc de nestre Aquilee, al scuen jessi restât di clap sintint il pape Zuan Pauli II a laudâ la funzion storiche, religiose e missionarie di Aquilee, une mari che ognun di nô al à di tignîsi in bon di vêle vude, cu la cuâl che un so predecessôr, Benedet XIV, dal 1751 al à disfât il patriarcjât di Aquilee disint juste il contrari: che Aquilee e jere stade la colpe di dutis lis divisions e il mâl dal mont e e mertave fruçade.

Lassant stâ i aspiets plui scontâts, coreografics e sentimentâi di un viaç dal gjenar, la sorprese, e grande, de visite dal pape in tiere furlane e je stade sore dut cheste esaltazion di Aquilee, il ricognossiment di chê realtât ecclesiastiche e storiche che nô, a bon dirit, le tignin come fonde e mari dal nestri jessi cristians e furlans. O sin furlans parcè che o sin aquileiês. O sin aquileiês parcè che o sin furlans.

Tal contest di cheste conversion totâl di Rome tai confronts di Aquilee, che tai paîs dal Est le clamaressin riabilitazion, si varès podût spietâsi magari che il pape al domandâs perdon di une siele dolorose e sbalade e al ricognossès il nestri dirit a tornâ a vê la nestre sente patriarcjâl. Ancje la justizie lu pretindarès. Ma o podìn ancje jessi larcs e contentâsi di chel che al à dit, fat e lassât capî.

Vignint intune regjon di confin, esponude a ducj i garbins, tignint cont ancje des "perplessitâts che di tantis bandis si faseve su lis modalitâts de visite plui che su la visite stesse, no sarès stade marivee che il pape al ves batût sui pericui dai regionalisim o dal particolarisim e su la necessitât e la grande furtune di jessi unîts anime e cuarp al centri de catolicitât. Lu veve dit dal '72 Pauli VI, un pape plui problematic ma plui pussibilist di chest.

Nus pâr che lis resons di chest gambiament di intono, che si lu à sintût sore dut te celebrazion di Udin, a sedin di ordin internazionâl e locâl.

A nivel internazionâl al è sdrumât il mûr dal comunisim e duncje chei che a jerin i plui esponûts al pericol ros a son diventâts a colp i prins interessâts dal gnûf ch' al sta nassint. Ribaltantsi la situazion, la frontiere si tramude in parte. E Aquilee e torne a cjapâ chê funzion missionarie e di colegarment che e je stade la sô ricjece intai secui. Sore dut cu lis nazions a pene creadis di Slovenie e Cravuazie.

A nivel locâl o vin di dâ at al vescul Battisti e al so staff di une sensibilitât insospetade pal nestri mont e pal nestri patrimoni religjôs.

La religjon catoliche e dîs che il pape al è infalibil e nol pò sbaliâ. No je mai rivade a dî che il pape al sa dut. Duncje bisugne che cualchidun lu informi. Di chi l'impuartance dal vescul locâl e dai siei aiutants, tant in ben che in mâl. Se al vescul la culture locâl e la lenghe i interesse come il fant di spade, o adiriture al è contrari, al è clâr che il pape al fevelarâ di dut fûr che di culture e di lenghe. Si lu palpe tes celebrazions di Triest, di Pordenon e ancje di Gurize, fredis come il nâs dal cjan. Si sintive che ator dal pape al mancjave il spirt dal popul.

A Udin, cun grande sorprese di ducj, chest spirt, cheste cussience etniche, cheste sensibilitât si le à sintude vive. Di fat ogni volte che il pape al strambalotave par furlan, la int e leve tes stelis. E ducj a àn podût gjoldi dai colôrs des crôs fiochetadis, de

armonie dai nestrîs colôrs nazionai zâl e blu, de armoniositat de nestre lenghe e dai nestrîs cjants. Si à sintût che il popul al è ancjemò vîf e che al dâ di ca a pene che al sint il sô aiar, la sô clime. Fevelâ, a chest pont, di rût folclôr e di campanilisim al pò fâlu dome un gjornâl provinciâl e vecjo come il Piccolo di Triest.

Ce aial sburtât i organizadôrs udinês a dâi tante place al furlan? Cemût si sono rindûts di permeti che si presentassin adiriture dôs voris nassudis fûr dal palaç e de curie, come la Bibie e lis 13.000 firmis? Lu àno fat par pôre des polemichis? Lu àno fat par calcul? Lu àno fat parcè che il Signôr ur à tocjât il cûr? Misteris de Providence! Intant lu àn fat. E nô ur al vin a grât. Ma si permetin ancje di cjapâju in peraule.

Ce conclusion si puedie tirâ, pal moment, di un fat eclesiâl come la visite dal pape e di un esit cussì positîf?

La prime e riguarde il grop di Glesie Furlane, incolpâts cun masse facilitât e superficialitât di jessi cuintri dut e cuintri ducj e di jessi disfatiscj. Se si gjavave des celebrazions papâls ogni riferiment a la nestre identitât culturâl e religiose, ce restavial? O intindin: ce restavial di vîf? E cui aial tignût sù fin cumò chestis usancis e costumancis? Chei di “Glesie Furlane” no pratindin di jessi tratâts di profetis. Ur baste di no jessi tratâts di int che e fâs dome damp.

La seconde le vin za dite. La int e sint, tal so subcussient, di jessi un popul, di vê une culture, une lenghe, une identitât. E à dibisugne di judâle a scuviergi i siei valôrs, onorâle, dâi corajo i fasarès dome ben. Le judarà ancje a viergisi di plui a la vite, a vê plui sperance, a riscjâ di plui. Ancje pe famee e pai fis. Se la glesie i ves dât plui dignitât, se la scuele e la pulitiche le vessin rispjetade e judade, ce popul vîf e biel che o saressin! Cirin almancul di no jessi vuarps cumò che o vin vude la prove. Aprofitînsi di chest “moment di grazie” par une gnove pastorâl, plui incjarnade.

E o sin a la tierce conclusion. Chi di nô no pò existi ni liturgjie ni pastorâl che no tegni cont de realtât plurilenghistiche e plurietniche. La pluralitât di lenghis e di culturis e je une robe spettacolâr, come un zardin cun plui colôrs. Si lu à viodût tes celebrazions, che nus devin la idee di jessi un struc di Europe. E nissun no si sintive umiliât o butât di bande e nissun no si sintive superiôr. Rivarîno a capîlu almancul di cumò indenant, se no lu vin capît prime?

Il vescul Battisti, denant dal pape, al à riclamat il stat talian a jessi di peraule cu la sô costituzion. Ben dite! Ma rivarae la glesie a jessi plui brave dal stât e di peraule cu la sô voe di libertât che si clame vanzeli?

In chest telâr e devente plui urgente la propueste fate za timp: di vê finalmentri un vicjari episcopâl pes popolazions des lenghis minorizadis (furlane, maioritarie, ma ancje slovene e todescje) e di istituzionalizâ cheste nestre realtât vere te glesie catedrâl ogni volte che al dîs messe il vescul.

Se si à vude la intuizion e la coretece di mostrâ, la vere muse de nestre glesie denant dal pape e di tante int di diverse divignince, e cun esit pusitîf no si capîs parcè che no si varès di fâ almancul la stesse robe te nestre catedrâl cu la nestre int. No volin pensâ che dute cheste profusion di furlanetât e sedi stade dome un fum tai vôi o une siele di une zornade. Al sarès un delit e il tradiment di une sperance che si è impiade tal cûr dai furlans.

O sierin chestis notis suntun viaç e un fat eclesiâl che siguramentri al cjape dentri ancje tancj altris aspiets mancûl sflandorôs. Come par esempi il tratament umiliant riservât al cûr dal Friûl, la Cjargne, viodude dome svualant su la Mariane. Indelicatece ripetude in

tal ofertori de messe, cuant che, a presentâ la fantasie e il mistîr di gjenerazions di artesans cjargnei, a son stâts sielts doi polacs. No crodìn di dî une eresie domandant pe Cjargne e par chês tristis realtâts periferichis almancul chê atenzion che e je stade doprade cul industriâl Rino Snaidero, ricevût in udience private.

O ripetìn: di chest viaç dal mût ch'al è stât progetât, dal formalisim che lu à compagnât, dal stamp di glesie che al è stât confermât a saressin tantis robis di dî e pò stâi che cul timp e vegni l'ocasion di tornâ sore. Ma no volin ruvinâ une atmosfere di serenitât. Sore dut o ringraziìn il Signôr che i à permetût al nestri popul di tignîsi in bon des sôs lidrîs culturâls e religjosis. Par une volte, la muse dal popul furlan si è presentade come che veramentri e je: segnade dai agns e dal cors de storie ma no sfigurade, antighe ma no distudade. Siguramentri in grât di frontâ lis sfidis dal avignî. Se dome cualchidun i des une man.

6 di mai dal 92, aniversari dal taramot

Glesie Furlane